

0 10 20 30 40 50 60 70 80 90 100 110 120 130 140 150 160 170 180

Inches
1
2
3
4
5
6
7
8
9
10
11
12

Centimetres
1
2
3
4
5
6
7
8
9
10
11
12

Kodak Color Control Patches

Blue

Cyan

Green

Yellow

Red

Magenta

White

3/Color






图
书
馆
印



先嚴政尚八十四歲鑽像



馬涼鈞敬慕

右先公松鶴圖小影嘉慶辛未繪於袁江者神似八九外家藏尚有十一軸並記於後以示孫子

虞山琴鶴圖 庚辰

桐陰小坐圖 甲寅

探甲大像 丁巳

舟行小影 戊午

雙鶴哺雛圖 壬戌

欹石晏坐圖 戊辰

松陰晏坐圖 庚午


又白描松鶴圖 辛未

柳陰晏坐圖 辛未

蟒衣大挂像

朝衣大挂像

道光丁亥七月男亮鈞附識



康茂園先生像贊
身蹈黃河三持旄鉞
履險如屏藩在心縣
恩遇大雨朝寒始終
蓋以儒術發為節

名臣事業文章亦稔
出其緒餘富貴詎有
關於豪末也哉

東鄉愚姪吳嵩棻謹撰



茂園自撰年譜卷上

男亮鈞校棻

基田姓康氏字仲耕號茂園霞蔭堂名也山西太原府興縣人

按通志氏族畧載康氏姬姓衛康叔支孫以氏爲姓前趙有黃門侍郎康安前燕有康遷宋有康說梁有康約望出會稽東平京兆宋有康戩康亞之爲盛族然皆世遠年湮多闕畧不可考先世本居陝西清源相傳爲明武功康對山先生海分支溯自前明

始祖諱登有公始由清源遷于今山西太原府之興縣
著籍焉縣舊名合河

二世祖諱通甫公

三世祖諱友才公

四世祖諱伯諒公

五世祖諱玉公

六世祖諱熹公

七世祖諱天相公

八世祖諱宦公九傳至

高祖映潔公諱心月邑庠生

妣夫人

曾祖虞風公諱太雍邑庠生

妣亢夫人同邑公女

祖衆之公諱萬方邑庠生

妣郭夫人同邑安齋公女

父還齋公諱惇字子厚邑庠生

妣王夫人同邑諱元公女

高祖以下皆以基田官逢國大慶累贈至資

政大夫兵部侍郎兼都察院右副都御史江南河道

總督提督軍務妣皆贈至夫人

衆之公生四子其三卽先考還齋公幼開敏爲文

章操筆立就年十七補博士弟子員家貧無擔石儲

然喜購經史教子弟讀書悉口授無所遺嘗曰吾不能治生產然生產有時而盡吾以墳籍貽子孫其為田宅也多矣嘗增築宅舍數十間及成盡讓諸兄弟居性剛嚴尚節義重然諾邑人張成負人債千金數被窘辱致病困公憫之漫以好言慰之曰若無憂吾當代償耳實不能代償也未幾張死公聞之喟然曰前雖出一時慰藉詞然生許之而死背之非夫也立詣債家易張券為已券久竟畢償無遺事載墓誌及家傳中生三子長基命字靖軒候選按察司照磨次

即基田又次基淵

字

靜溪乾隆壬申進士原任江西

廣信府知府皆先妣王太夫人出

雍正六年戊申三月初八日亥時余始生年一歲

雍正七年己酉二歲

雍正八年庚戌三歲弟靜溪生

雍正九年辛亥四歲

雍正十年壬子五歲

雍正十一年癸丑六歲

雍正十二年甲寅七歲始入塾

雍正十三年乙卯八歲

乾隆元年丙辰九歲

乾隆二年丁巳十歲

乾隆三年戊午十一歲

受業於從伯父子丹先生得聞主靜之學先生諱忱

康熙戊戌進士由詞垣改部曹出守黃州以清介迕

上官劾歸著有友霞詩鈔余作跋並臨桂相國陳文

恭公所作傳付梓行世

乾隆四年己未十二歲

是年二月初四日先贈資政公卒於里居年五十

有二余擗踊哀毀如成人禮

乾隆五年庚申十三歲

居廬二月初八日葬先贈資政公於大園梁祖

塋之次時僅存老屋五椽租糧十四石與伯兄靖軒

季弟靜溪奉母共居親串中或有勸王太夫人命余

棄儒服賈者余號泣弗從太夫人曰汝志果堅吾何

憂力卻其議勸者不悅而去

乾隆六年辛酉十四歲

居廬五月服闋補弟子員始通經史
乾隆七年壬戌十五歲

時同里孫文定公嘉淦休於家往請業焉公有知人之鑒常語人曰康氏子器宇非凡他日必出人頭地所以題拂而揚詡之者無所不至

乾隆八年癸亥十六歲食餼於庠

乾隆九年甲子十七歲

乾隆十年乙丑十八歲

乾隆十一年丙寅十九歲

三月元配孫夫人來歸同邑庠生諱莊公長女公後

以亮鈞官 賜贈朝議大夫工部員外郎加二級

乾隆十二年丁卯二十歲

乾隆十三年戊辰二十一歲

受知於學使德定圃先生冀寧觀察黃德士先生拔入晉陽書院刮目相待試輒冠軍掌教為沁州進士吳聖功先生尤相器重余慮靜溪獨居無師失學並挈至書院共讀時家貧親老分寄膏火以繼饗殮余與靜溪在院每晨煮粥一甌俟稍冷凝結箸畫為二

分作早晚餐夜則兄弟共卧一駱駝毛衾中彼此轉側不能蔽體因分前後半夜起讀以資休息焉

乾隆十四年己巳二十二歲

在晉陽書院陽曲張氏延課其子

映宿後 映宿 成丙

戊進士

乾隆十五年庚午二十三歲

余自來晉陽文名頗著而屢躓鄉闈是科靜溪初次觀場卽報捷瑁璫之餘亦復自慰

乾隆十六年辛未二十四歲在晉陽

乾隆十七年壬申二十五歲

在晉陽長子申眷生是年

覃恩加科改試期爲

春鄉秋會余鄉試又被落秋靜溪捷禮闈歸班候選知縣

乾隆十八年癸酉二十六歲

在晉陽余屢困棘闈意興闌珊不復作進取想至是

受知於學使高密李正甫

師中

先生選拔貢生秋復

舉鄉試第三名出稷山縣知縣紹興周芝山先生

世

房主試翰林院侍講仁和金海住先生

姓

刑部郎

中丹陽睦樹人先生 朝棟

乾隆十九年甲戌二十七歲

春初北上四月子申眷殤同月元配孫夫人亦卒於家夫人歸余凡九載深得王太夫人歡心家事艱難之際親操井臼儲休啟佑實與我家乃余甫得一第方冀食報將來遽相捨去並不及握手一訣六十年來每追思輒黯然神傷不僅悼亡于當日也會試中式明通榜以教諭用總裁大學士海寧陳蓮宇先生 世倌 禮部侍郎長白景菴先生 介福 內閣學士武進

錢稼軒先生 維城 九月歸里吾母王太夫人以中饋

不可久虛命迎繼室孫夫人歸卽 地贈朝議公

莊 第四女元配胞妹也

十一月選授代州繁峙縣教諭

乾隆二十年乙亥二十八歲

春赴繁峙任地居塞上官是寒瓊人多苦之余至與諸生講學因材誘掖其後門下士領鄉薦者接踵

乾隆二十一年丙子二十九歲

在繁峙

乾隆二十二年丁丑三十歲

會試中式第十九名出翰林院編修安州陳漁湖先

生^筮房總裁刑部尚書後任大學士諸城劉文正公

統勳禮部侍郎長白景菴先生^{介福}禮部侍郎仁和

金慕齋先生^{德瑛}殿試三甲第十一名 賜蔡

以臺榜同進士出身卽用知縣分發江蘇

乾隆二十三年戊寅三十一歲

六月補新陽縣知縣迎母王太夫人就養並兄靖軒

弟靜溪及諸弟子基彬霖鈞儀鈞綸鈞至署承歡之

餘延師督課皆相繼成立謹按王太夫人年十七來

歸先贈公勉佐助能甘貧苦善事舅姑二十餘年

無間言先贈公捐館家益落太夫人三年不出中庭

作苦以育諸孤夜篝燈課讀覲述先贈公事聲淚俱

下余兄弟悚惕聽受不敢忘及抵余任所每入見必

問今日所治何事聞有善政則喜或平決未當輒不

食俟改乃釋然時以清慎爲誡曰吾素安貧毋以貧

故累汝志自奉廉約無紈綺之服遇物必問所從來

嘗進新衣太夫人曰人生服用宜留有餘吾欲汝爲

廉吏安得餘貲營此耶固卻不御基田五十年來升
 沈宦海以廉潔上邀
 兩朝知遇之恩者悉本
 太夫人教也

乾隆二十四年己卯三十二歲

在新陽春重修新陽縣致和塘疏城中玉帶河以流
 穢惡居民大便

十月制府尹文端公 奏調昭文縣昭文為常熟分
 縣事繁民慢豪惡把持夙稱難治余始至一糾以猛
 力擒巨猾陳奇等數人寘之法境內肅然且與吏民

約官惟飲水若等務革心相從始猶觀望期年乃幡
 然嚮風矣

乾隆二十五年庚辰三十三歲

在昭文秋充江南鄉試同考試官得蘇州薛起鳳無
 錫顧杏章尤佩蓮崑山朱樹翬等八人來謁留薛課
 諸姪讀聘顧堂姪女為弟靜溪繼室迎來署同居
 分建六書塾于昭邑遠近鄉城在城者曰琴川課院
 在芝塘者曰正脩書院在梅李者曰梅李書院在西
 周墅者曰海東書屋在智林寺者曰智林書屋在清

水港者曰清水書屋皆次第興脩凡庠士秀民悉聽往肄業分聘賢士大夫為主講表正之以禮義考較之以文藝架弄閣儲書籍經史而外百家諸子畧備皆分俸為之一切器用財賄就其處為計畫因勢利導綽如也余暇往督課而獎勸之及乙酉鄉試肄業諸生獲售南北闈者五人先後補弟子員者二十餘輩為一時之盛此外如吳制軍熊光張侍御敦培皆其尤也

乾隆二十六年辛巳三十四歲

在昭文王太夫人以余尚未有子命撫靜溪次子綸

鈞為子生八年矣 十月長女文生

開昭文縣稍里新市徐市吳市歸市等蓄清拒渾之河凡十四道皆去其游沙使深廣護以隄防旱可納潮潦可洩水入江海荒瘠之區悉成膏壤又于農隙徧閱傾圯杠梁次第新之行旅負販者不復病涉民皆稱便

八月余過昭文南街有雉經于水柵門下者救甦詢為無錫華啟璵因年荒失館無以養母故密訪果有

全譜 卷一
母餓將斃其鄉人以其曾割股皆稱爲華孝子余嘉其孝而憐其愚並迎其母來詢知七世單傳三十七歲尚未婚爲聘崑山顧氏女俾延宗祀留署中五六年始去事詳文集中

乾隆二十七年壬午三十五歲

在昭文

乾隆二十八年癸未三十六歲

在昭文子昭眷生尋殤

乾隆二十九年甲申三十七歲

在昭文春靖軒兄送王太夫人赴豫先是靜溪謁選得河南嵩縣屢請迎太夫人余不忍離膝下又不能固卻送至無錫太夫人促使返署歸已七日忽怦怦心動坐卧不寧恍惚間覺太夫人途次遭疾立挈醫駕小舟追及京口太夫人果抱恙舟中見余至驚喜曰吾無憂矣汝視吾舌舌黑如墨急命醫診視投以祛寒熱之劑三日而愈復送渡江乃返計出境已逾半月矣

十一月子亮鈞生

先是中丞陳文恭公舉余為通省辦漕第一以風勵僚屬繼而制府尹文端公中丞莊滋圃先生以余任內地丁漕項蘆課各錢糧四載全完 題請議敘 部議卽陞

乾隆三十年乙酉三十八歲

在昭文秋復充江南鄉試同考試官得金行模曹杰等七人

乾隆三十一年丙戌三十九歲

在昭文六月推陞廣東潮州府通判又因昭文縣任

內拏獲洋盜邵滿等十名奏奉

硃批送部引

見十二月引

見奉

旨回任以同知題

補卽請假赴嵩縣省親時靜溪宰嵩修渠溉田兩年豐收著有成效中丞阿思哈公疏請批司記功奉

上諭該縣康基淵挑濬伊河兩旁古渠並山澗諸流可資引導者一律疏治深通灌田六萬二千餘畝洵屬崇尚實政留心民事之員僅予記功不足以示鼓勵康基淵著交部議敘一介小臣仰邀恩獎聞之同深感荷

乾隆三十二年丁亥四十歲二女重生

正月至嵩縣時靖軒及適孫氏姊亦在署迎門告曰
昨堂上已知汝來矣余驚喜叩詢太夫人曰余偶心
動故知之耳于是三子一女及諸孫俱會於嵩綵舞
承歡太夫人環顧色喜後數旬邁微疾因歎曰吾老
矣汝等馳驅南北思合堂同席何可易得今適會於
此亦人生至樂也夫悲樂常相因吾疾其不瘳乎既
而疾果劇以三月七日戌時卒於嵩縣官舍年七十
有七余哀毀幾不欲生先是靜溪由昭文迎王太夫

人至嵩比入境嵩民鼓吹出迎百里不絕嵩政簡而
俗淳太夫人樂其土風嘗以春秋出行田家婦聞之
競迎拜太夫人與老者言慈少者言孝賜果餌歡如
家人靜溪爲太夫人築百合園夏則清暑其中四郊
婦女咸來起居或有勃谿時亦往愬太夫人因人勸
誨多感悟道路寒凍者歲蒙賜衣下逮囚繫咸預恤
資遇旱禱雨必蔬食減飯曰民困亟矣吾敢晏乎卒
之日嵩男女臨奠哀慟者日數十百人後卽所築百
合園中立祠致祭歲時不輟 九月偕靜溪扶柩還

里

乾隆三十三年戊子四十一歲

在籍居廬 秋姪儀鈞舉京兆鄉試

乾隆三十四年己丑四十二歲

居廬二月二日合葬 先妣王太夫人於大園槩之

先塋六月服闋赴部領照赴廣東候補

乾隆三十五年庚寅四十三歲

二月攜眷赴粵五月委署新寧縣十一月二十五日

交卸即委署澳門同知

乾隆三十六年辛卯四十四歲

命亮鈞就傅學詩 三女蕙生

四月交卸澳門同知事五月署博羅縣七月初七日

交卸初八日即委署惠州府兼署惠州府通判八月

俱交卸十一月復委署博羅縣舊有講院久圯余

訪得黃甲峯頭有廢寺山岡環繞溶水潑洄謀改建

之或怵以佛氏禍福之說余曰因地設教有司職也

若有殃咎願以身當遂鳩工移建堂廡齋廊以次備

舉閱月工竣額曰登峯書院延祿勸檀公萃主講席

于是多士蒸蒸日盛科第不絕

乾隆三十七年壬辰四十五歲

七月交卸博羅縣事 八月題補雷州府同知未到任又檄署廉州府同知復署欽州知州因考試作酒米論勸士子讀書

乾隆三十八年癸巳四十五歲

在欽州二月十九日

特旨授廉州府知府四

月十五日卸欽州事到廉州府任廉地濱海瘠苦太守兼領鹺務前課多缺余亟請調劑于制府李公侍

堯不許且嚴檄禁追另募殷商接充令下人心皇皇余不得已密召疲商數十人諭以禍福發庫貯備公銀萬兩借給先期得價皆踴躍急公于是竈無不積之鹽商有盈餘之利期年而廉場七十二埠之虧帑悉歸如額制府始竒之事詳文集中

乾隆三十九年甲午四十六歲

在廉州郡城距海僅四十里地卑土薄晨夕霧昏春夏雨淫人多中溼發瘟毒向無洩水溝渠余尋得故水洞於東南城下設法疏治洩城中積水開通龍江

入海故道八百餘丈東關外築廩舍二百餘間復古
衛民墟以招徠商賈訪東坡井亭故址葺而新之建
海門書院增立學舍凡諸工役余皆召父老面授機
宜令民自爲之不發牒徵夫使里正累民按合浦自
康熙以來七十餘年無登賢書者自是領鄉薦入詞
垣者不一其人如馮敏昌李符清李馥香陳邦泰藍
應元賴景泰陳宏猷諸君皆一時英俊聯袂並進謂
非地效其靈哉

聞綸鈞舉於鄉爲遵例報捐內閣中書 四女瑞生

乾隆四十年乙未四十八歲

八月署惠潮嘉道重修潮郡韓江樓樓外江水接天
而下登眺間遙見北隄卑弱慮不足以禦江漲卽鳩
工用三合土增高五尺濶如舊制踰月而汀贛潮三
水並發新隄不沒者才二尺耳幸免于患不覺額手
稱慶

潮郡每雨後街巷中水深數尺往來者倩人負渡余
訪知城內有橫直大溝自前明以來卽湮塞不通亟
按形啟視下皆巨石細砌堅整如故寬深五六尺不

全譜 卷一
等益服前人治事之精乃次第修復勸民遷讓遂通
流如舊迄今無患

伯兄靖軒卒于家先是庚寅余赴粵悉讓產業屋舍
於靖軒居守歲時饋問不絕聞訃悼慟彌已

乾隆四十一年丙申四十九歲

四月卸惠潮嘉道篆回廉州任於署西愛園闢池數
畝徧植荷花立亭閣架畧約及秋交印後每進諸生
講業其中興酣移席放舟東湖或乘月登觀海樓賦
詩飲酒爲樂

九月因護道任內失察嘉應州逃犯部議奪官奉

旨仍着該督撫出具考語送部引

見十

一月扞京遵例開復遂留京於西草廠衚衕儀鈞舊
寓西偏闢築數椽居焉 第五女生

乾隆四十二年丁酉五十歲

在京遊西山檀柘寺

十一月孫夫人挈子

亮鈞及

眷屬自粵抵京

二女俱以痘殤

乾隆四十三年戊戌五十一歲

三月選授河南懷慶府重修覃懷書院增設膏火秋

年譜 卷一
散賑于陳留杞縣時河決時和驛分三股南下屢塞
屢決浸儀封城不沒者三版院司檄余往護人皆爲
余危余竟掉扁舟自女牆入立城頭率民夫相機搶
築七晝夜水退而城完旋派挑引河時相國阿文成
公以重臣駐工督辦深相器重明年奏調知開封從
此遂兼任河防矣

迎適孫氏姊來署

乾隆四十四年己亥五十二歲

五月調守開封仍在工次督挑引河恒宿料船中風

日侵薄日常淚冬靜溪自甘肅赴任江西取道豫工

至舟中相聚數旬始命

綸鈞

率其婦賀氏及子官自

京來署與

亮鈞

共學甚相得

乾隆四十五年庚子五十三歲

正月 覃恩贈祖父並爲朝議大夫河南開封府

知府祖父母皆恭人

在考城五堡漫口工次承挑引河按儀封大壩合龍
未及數月屢合屢開下流湧漫之水復迴流渟淤以
致南北橫潰不止者河槽驟未能刷深故也

乾隆四十六年辛丑五十四歲

是年往來祥符八堡十六堡青龍岡四門堂各漫口
工次承辦挑河築壩事夏署開歸河道篆兩月卽交
卸仍留工次幫辦河道事而別委員攝開封府秋始
回任

三月嫁長女於沁州吳壻沈大學士文端公典曾孫

後成乙丑進士

七月甘肅監糧獄起聞靜溪弟卒于鉛山舟次靜溪
與余卍角相依友愛尤篤先後同登仕版自巳丑服

闕謁選得甘肅鎮原縣歷宰臯蘭牧肅州擢知江西
廣信府所至以勸農桑修水利興學校禁溺女爲已
任民懷其德建立生祠著有南圃文鈔家塾蒙求女
學纂諸書又合刻霞蔭堂時文數十首行世聞呈議
被逮北來時余在考城之四門堂督挑引河亟令二
子分迎途次皆不及而返旋得訃驚悲失措揮淚河
干痛哭失聲遣迎其柩迄今卅餘年每憶及猶涔涔
淚下不已也

先是豫省頻年疊遭河患所需稽料例按通省地畝

分派責大戶承辦上供十束千錢追呼擾累民不堪
命余目擊其弊時三省督撫會集工所亟白中丞富
勒渾公請發帑採買以蘇民困中丞遲疑未卽諾某
節使在旁喞叱曰此例久行如可改前人早改何待
爾言况欽工大計設有貽誤卽網棄太守於中流何
足蔽辜而敢擅言變法耶衆皆悚息余復奮然進曰
且暫假五萬金交某試爲之若悞甘受重罰願以一
身代千萬人苦累不悔也遂乞中丞領銀分道晝夜
採買稽糴絡繹如期而至不旬日千堆隆隆然中丞

聞報喜曰若然則例可改矣始如議奏上得

旨允准由是派料之例永除

是年 大計卓異

乾隆四十七年壬寅五十五歲

在青龍岡工次五月奉 特旨康基田著于大

工告竣後給咨送部引 見蓋 特達之

知也

夏靜溪樞及眷屬返自西江時因無家可歸爲購十
數椽于河內之中道村以待七月樞至余乞假親往

五言
憑棺一慟并撫安弟妻及諸姪于新居而姪儀鈞亦

自京至後又購屋於太史莊令居之延四明黃孝廉

定文課諸姪讀

十月亮鈞娶婦王氏同邑太學生思雅公女

乾隆四十八年癸卯五十六歲

正月擢河北道鑿濟源之五龍口濬廣濟渠引沁水

下注濟源河內修武武陟等縣溉民田數十萬頃修

復前明袁公應泰舊蹟中丞何公裕城上其事奉

硃批好知道了事詳文集中

十月命綸鈞北上入直內閣

十一月遵旨赴部引見旋蒙

召對訓迪有加領感備至都門向無太原會

館公車多苦逆旅余先後捐資數千托王柏崖給諫

孟蘭洲太僕卜地于宣武門西之皮庫營分築館舍

以資棲息十二月回武陟署為姪霖鈞姪孫瀚

及堂弟基彬各由廩生加捐貢偕入國學肄業期滿

皆捐分發回省試用迎伯兄嫂延恭人至署

乾隆四十九年甲辰五十七歲

三月駐工修防十月始還武陟署每歲皆然搶修蘭陽北岸銅瓦廂埽工按銅瓦廂地居黃河上游外灘高水面二丈下臨曹充諸州橫衝運道歷稱險要忽廻溜曲注十一段大埽齊蟄汕刷隄坡勢甚危急時已白露工所料物用盡僅存制錢三千措辦不及適瞥見下游有停泊西河船三十餘隻卽親往牽至隄前排列攔溜溜稍緩塌漸止而八十餘丈之工亟當補鑲非萬夫之力不可迺加價廣募又苦錢絀因詢各船皆販麥重載勸令卸麥岸上倍價賒買俾衆夫

以錢易麥得錢仍散給夫週而復始于是衆夫雲集兩日夜而隄後土截築實上游料物亦陸續運至乃晝夜開占補築卽用西河船捆鑲恰合用得力先於上流築似蓋壩挑開溜勢使溜不直衝然後以次補還空檔聯成一片重土鑲壓閱二旬工竣又搶修下北河十二堡塌埽險工時汎水大至衝激搜刷大埽頃刻蟄陷三段急捆船補鑲而水峻利搜根不已潰及隄坡勢難固守乃于上灣轉折處因地勢作挑水壩挑溜東去層層盤壓到底于是水緩淤

停而隄固設止就塌埽處搶築水力猛厲非人力所能勝故搶大險與平時鑲護不同全在得勢勢得則化險爲平不得則入袖之衝危在呼吸矣

乾隆五十年乙巳五十八歲

在武陟正月

覃恩晉贈祖父並爲中憲大夫

河南河北兵備道祖母母皆恭人

連年河朔游饑民困斃相枕藉于道余目擊心傷定議煮賑與所屬各捐廉俸買米復發倉貯穀石碾煮又請撥漕米一萬石濟用躬自持籌詳立章程并以

工代賑指困勸糴實力經營全活者數百萬衆旣而衆盡人增嗷嗷待哺者益衆傍徨間幸甘霖大沛人散事定畢中丞沅手札有富鄭公之賑青州不是過矣之語事詳河北採荒記中余以六句來積勞成疾月餘始愈

二月葬靜溪于濟源王屋山下之任家窰余先延地師熊某所卜定又于其左之馬嶺得一域令徧植松柏擬築生壙焉并諭兒輩以元配孫夫人葬經三十餘年况曩時家貧歛薄萬難遷徙將來斷不可拘合

葬之說反令亡者不安寤

乾隆五十一年丙午五十九歲

在河北

綸鈞補中書送其眷入都

六月調江南淮徐道時桃源南岸之司家莊先已決口到卽僱辦堵築事宜九月合龍完竣

是年微山湖蓄水無多重運不足資浮送查邳宿運河猫兒窩以下自張伯行建河定成三閘後更增亨濟利運二閘水勢乘高直瀉浮沙流注下多砂礮難挑余議於五閘中間擇馬莊集及坡墩二處添建石

閘各一座節節關束濟運更于閘左各建月河以便節宣督河兩院據以入告得旨如所議行又

詳請奏添改邳睢爲南北二廳以免鞭長不及之慮冬巡歷各廳逐處探量水勢自黃河北岸茅家山一帶悉皆疏通以備春運按自堵塞漫口後淮黃二瀆合流滌去泥沙並注入海掣吸之勢重而海口遂通不束水攻沙而歸咎於海海無可濬之理潘印川曾言之矣

九月迎眷屬于武陟余慮靜溪弟婦村居無依又恐

諸姪寡陋失學也遂留

儀鈞

居守而令

文鐸綜鈺紹

鋪及姊妹等奉母並其師同隨任徐州復至江寧共居衙署數年為料理婚嫁事畢命綜鈺紹鋪歸赴縣試並補博士弟子員

乾隆五十二年丁未六十歲

在徐州二月陞江蘇按察使奉

上諭伊由河

北道調任淮徐道於河工事宜最為諳習且辦事認真不辭勞瘁每年伏秋大汛時仍應令赴淮徐一帶幫辦修防諸務庶于河工有裨

三月抵蘇州臬司任清理積案有舊僚女孫此離蒙

難而志節堅貞余力為湔雪且擇配書院諸生蔣寅

是年即領鄉薦吳中傳為佳話觀風各屬拔其尤者

如吳光悅等十數人皆招致署中飲食而獎勵之為

光悅經營婚嫁相從十餘年掖登仕版時吳廷琛纔

十五齡余愛其才字以靜溪少女時頗有以寒峻為

嫌者余笑置之壬子登賢書來迎娶浮議始息及壬

戌大魁而姪女已先亡不及見矣人事固可逆料哉

綸鈞捷禮闈即用知縣諭令呈請仍留中書任嫁

三女於同邑州同知銜孫壻豹章

加車邏南關等壩封土以護下河按五壩洩下之水
分歸江海歸江則得建瓴之勢歸海則有盈科之憂
非遇盛漲不可啟放若輕開五壩以洩黃撤南關諸
壩封土以淹下河則全河之勢皆因此而壞所關甚
大須慎之又慎也

五月赴徐州防汛 重修徐州雲龍書院增置腴田
數頃充膏火勒碑以紀

六月河決河南睢州奉 旨馳往工所協辦建

壩挑河各事務

十月睢工合龍事竣入 覲疊蒙 召對

命隨班陪祀 天壇亦異數也十一月回任

乾隆五十三年戊申六十一歲

三月陞江寧布政使仍兼管河務

嫁四女子韓城師壻慕祖 淮徐觀察 彦公 第三子也

夏遣姪 綜 鈺 紹 鏞 先後娶婦於江陰仍攜回署

六月赴徐州防汛搶築邳北之趙家馬路等工竣按
該處向無工程因近年溜勢坐灣由上壩側注刷及

下壩隄根若祇從下壩鑲做水已入袖勢更着重必接塌不已返致棘手余令從上壩展寬埽段堅築大壩二道挑溜斜向東南則下壩水緩無虞盡力搶鑲遂保平穩此因地制宜之法非必定於患處着力也
乾隆五十四年己酉六十二歲

三月八日署江南河道總督奏請疏玉皇閣引河督理陳家莊老壩工馬起營各埽壩及請挑濬唐家灣引河各事宜奉
硃批欣慰覽之本月二十五日交卸回江寧任

五月防汛睢南河溢周家樓上游魏家莊又報險余倉猝登壩搶護埽裂翻壓水底忽大溜迴旋衝埽復起余乘濤直上手觸船纜挾出層波登岸急易衣仍立堤上督員弁協力搶護至三鼓埽定工完事聞

上親解御佩黃辮大荷囊及奶餅馳

賜

下游周家樓亦合龍周工卽朱家海其地河勢自北轉西復由西轉南而向東水屈曲洄洑南面一帶埽壩處處着重余前任淮徐時曾于上游西岸稍高處築挑水壩長六丈餘挑溜勢使對衝北首沙灘順東

直去南岸埽工連年藉以平穩後接任者以挑溜太重工險費繁收進三四丈止留靠岸數埽而已適余來協防見其改作失勢大驚時已入伏溜湧堤根勢難前進不得已令加帮後隄作重門保固而隄皆沙土須用油泥包護工未周秋水又大至急捆船補鑲土鬆隄裂船不能繫水遂漫入猶賴後堤攔截水停一晝夜始塌寬百六十餘丈乃隨同河帥漏夜加修先裹護兩頭東西築壩下游開挖引河仍於西首加築挑水壩接築如前式兩閱月挑水大壩工成口門

止存十餘丈尚未挂纜引河亦未收工夜忽發大水挑水大壩逼出之水湧滿直射引河掣溜全去口門內水緩停淤不半日淤高丈餘兩壩齊下大埽遂挂纜合龍功卒成于挑水大壩可見河工有一定機宜失則千鈞難挽得則一舉成功也

是年開桃源縣大成河洩四郊漫水入洪澤湖又浚銅沛食城河宣洩昭陽微山二湖水道以利農田兼濟漕運

疏陶莊引河並於進水下唇築做兜水柴壩大汛時

水長相機開放于是順黃壩埽工益臻鞏固督河兩院合詞具奏奉
硃批覽奏欣慰

乾隆五十五年庚戌六十三歲

三月署安徽巡撫四月回江寧任五月因失察所屬書吏舞弊革職留任旋被逮入都發軍臺効力九月奉
旨發往南河以同知用十一月奏署淮徐道到工周歷審視毛城舖至王平莊一帶二十里民堰情形最爲吃緊擬接竇家寨民堰築橫堰一千餘丈直抵大壩尾以截西來頂冲之水使由東倒漫而

入倒溝水平緩無力最易停淤無須糜費人力其王平莊對岸灘勢挺入河心擬于上游灣曲處估挑引河一道引溜北趨以免南堰著重並補還上下各民堰漫缺處層層收束俾資防禦皆先後詳請奏辦完工及次年伏汛水長竇家寨王平莊以南河灘內普律串溝漫水滙注堤根新民堰下水深至三四尺不等幸賴先事豫備料物應手均得鞏固無虞奏入奉
硃批以手加額欣慰覽之

乾隆五十六年辛亥六十四歲

在徐州三月制府孫公士毅檄開毛家莊王平莊一帶各隄堰均經該道督率工員實力修竣並將碭汛大隄直接河南交界加築子埝層層保障足資捍衛復慮及北岸順隄河形查明酌給礮水銀兩俾鄉民共知防守辦理甚為周密該道明體達用須再通盤籌計將上下游亟應預為料理之處悉心商度定議等因余即遵查列欸詳覆制府據詳入奏奉
硃批好欽此事詳河渠紀聞中

九月兩院奏報霜汛安瀾疏稱立秋後水勢迭長經

淮徐道康基田隨時督辦搶護安紮木龍啟峯山各閘分洩水勢南北兩岸工程俱臻平穩並據臨河士庶僉稱黃河底較去年刷深四五尺不等可冀永慶安瀾歡聲載道等語奉
硃批實可幸欣慰覽之

十月增築天然峯山各閘壩工竣按兩處閘壩均係減洩黃水入湖保障隄工緊要關鍵向例遇大汛相機啟放秋冬水落堵閉原前人立閘之意洩暴漲過盛之水非獨助淮益清敵黃也然必受以節制不宜

過洩蓋徐州上下河身皆仗水力刷沙秋深水漸消力緩則沙易沉故必亟時堵閉而不可緩亦一定機宜也

乾隆五十七年壬子六十五歲

在徐州六月搶築孟莊挑水大壩時河水暴漲勢忽變由王家山根轉灣直衝南岸大隄頃刻汕去隄坡潰及隄身該隄向無埽工不存料物轉運弗及余令急伐近隄柳枝傳諭附近民居凡有舊稽料穰草及應拆蓋之老屋加價售買鄉民貪利頃刻運到集夫

帮築兩晝夜將潰塌之堤搶護完整而湍急之水接續下生且恐新埽不能抵禦暴溜乃從上游捆鑲挑溜大壩長寬各五六尺貫以長椿水衝激不動逼溜向東重土壓鑲三日始獲平定凡大溜坐灣之處若不設法攔截必至接生不已上提下坐往往搶護不及此以費爲省爲防守良法惟知工者善用之是歲通工搶修平穩奏報安瀾

是年創建徐州韓家山護岸碎石堤工並于其下築碎石挑壩引溜下注以保堤工

秋綸鈞充廣西鄉試副考官亮鈞應京兆試寄呈闈

藝頗清健詩亦出色傳觀同人皆以為必售竟被黜

而姪紹鏞暨吳婿廷琛是科各捷本省鄉闈余懷稍

慰

十二月赴部引見實授淮徐道

乾隆五十八年癸丑六十六歲

在徐州七月搶修桃源縣王莊隄埽工程危而得安
是時伏秋汛水叠長不止水從灘頭直湧而下王莊
正當急流頂衝埽塌堤崩此鑲彼潰勢將冲决危險

在頃刻隄下即桃源縣城垣關廂人民奔集隄頂呼
號求救不得已啟放上游祥符舊閘分流西下王莊
水勢漸見平緩土埽塌亦漸止乃漏夜鑲築平定桃
源城垣得以保全即堵閉閘口石閘易啟易閉故見
功速而亦不至大害然此亦於無可奈何中權輕重
為之非可為常法也霜降後上下各工搶修平穩具
報安瀾蓋是時河底刷深海口通流故易於防守也
乾隆五十九年甲寅六十七歲

在徐州七月曲家樓衝開大隄三十七丈時余在蕭

全譜
三
汛督工聞報馳回勘辦六晝夜堵合斷流新堤僨工
加培高厚工竣奏入奉
上諭此事深得康基
田之力伊先行趕緊圈築越堰繞過缺口次第施工
辦理甚屬可嘉應加恩獎著賞給按察使銜用示鼓
勵

乾隆六十年乙卯六十八歲

五月擢江蘇按察使奉
上諭康基田熟悉河
務仍著幫辦河道事務

七月伏汛搶護各工平穩奏報安瀾奉
上諭

康基田尚爲出力著先行議敘部議准加一級
十月入
覲疊蒙
召對陛辭回任途次接

奉
上諭康基田向於河務情形尚爲熟悉是
以在臬司任內令其兼管河務現在山東運河道羅
煥病故運河關係糧運兼有黃河事務亦關緊要康
基田著調補山東按察使仍兼管河道事務十一月
初十日抵任

余久膺外任時念先塋屢擬乞假歸里祭掃迺連次
入
覲後俱以河事方殷
諭卽回任未

全譜
卷下
三
敢責陳每深榮念自癸卯迄乙卯屢措寄俸金付長
房姪銘代為經理并令於塋前加築通水隄以資
衛護

茂園自撰年譜卷下

男亮鈞校棊

嘉慶元年丙辰六十九歲

在濟南正月 覃恩晉贈祖父皆通議大夫山東

提刑按察使司按察使祖母母皆晉贈淑人本身授

階通議大夫山東提刑按察使司按察使妻孫孫氏並

贈淑人

三月按部省南登泰山歸命亮鈞承蔭領咨赴部

七月河決江南豐汛六堡奉旨馳往南河會

同制府

蘇凌阿

公河帥蘭公

第錫

商酌妥辦旋擢山

東布政使仍兼管河務既至豐工口門已收至四五丈引河水淺忽西壩陡螫十餘丈工所正礮料物用盡錢糧奏調不及兩公正深焦灼余檄山東附近州縣撥借銀十三萬六千餘兩招集料戶補築加挑旬有七日而工竣其借項合龍後報銷撥還東省是役也幸卽成功否則余擅調隔省錢糧終歸罔濟咎何能追而當時注意全局懼失機會不暇計及也合龍後蒙

賞戴花翎并

頒賜奶餅

嘉慶二年丁巳七十歲

在濟南春單汛三十一堡漫決時工無存料又值青黃不接之時料無所出余臨工命取村民麥秸及附近官民園柳以濟數日工竣及秋漲水大至新隄出水三尺水定溜不爲患旣而漲消淤停數年間漸淤漸滿順隄河之患永除山東士民見成功之速而且採取料物不煩徵調悉合機宜傳誦不已兗沂孫觀察星衍請勒石以紀余曰公事勾當了則已何以名爲迄今已十有六年余亦老而耄矣畧記梗概以備

遺忘

按部至曲阜瞻拜 孔林

七月擢江蘇巡撫奉

旨康基田諸悉河工仍

著兼管南河事務加兵部侍郎兼都察院右副都御

史銜因現辦挑河築壩及邳宿一帶緯道隄工並徐

州賑卹事宜疏請于霜降後展

覲奉

硃批是

九月授河東河道總督頒賞

御製自責詩墨

刻一分

十二月再調江南河道總督仍留山東協辦曹工决

口由是專任河防矣

嘉慶三年戊午七十一歲

七月往來山東江南僭辦引河挑工宣洩深通曹工

合龍奏堵閉運河各水口完竣隨時察看湖水加緊

防守以俟重運

嘉慶四年己未七十二歲

在徐州工次正月聞

太上皇帝升遐伏地慟

哭五中摧裂罔知所措恭摺奏請

皇上節哀摺

內蒙 御圈 皇上念一身為社稷所憑依之

句並奉 御批勉為好官毋循積習民間疾苦濠

實入告又於報江境河道深通全黃下注睢工合龍

穩固情形摺內奉 御批此皆 上帝垂慈

皇考默佑我君臣應同感謝又奉 御批

實力防河民生胥賴我君臣期共敬勉 上蒼

皇考必錫厚福永慶安瀾矣又於覆奏條陳

河工情形摺內奉 御批汝在河工多年深悉治

河之法誠心妥辦從來有治人無治法總期工歸實

用帑不虛糜還朕一是字而已又於查閱河標營伍

摺內奉 御批汝之言尚屬可信然總宜隨時訓

練毋虛應故事一切實力為之凡陳奏事件摺內奉

到 硃批好 硃批是 硃批欣慰覽之不

下數十件感荷 兩朝厚恩 溫諭頻頒訓

勉備至愈思報効十二月奏請 陛見隨 駕

叩謁 裕陵以河事方殷未邀 俞允嗣會

同江督費公淳奏碭汛漫口堵合後凌水陡長壩尾

平蟄滲水情形摺內奉 硃批何如康基田若來

京何人在工督辦仰見 皇上洞燭幾先益感戀
無窮

四月 覃恩奏請將本身暨妻室應得 封典

賜贈曾祖父母奉 旨准其所請該部知道

晉贈曾祖祖父三世皆資政大夫兵部侍郎兼都察

院右副都御史總督江南河道提督軍務曾祖母祖

母母皆 晉贈夫人九月 覃恩授本身階為

資政大夫兵部侍郎兼都察院右副都御史總督江

南河道提督軍務妻 孫氏並 晉 贈 夫人

修儀徵臨江閘以利鹽漕運行

為 紹鏞 報捐內閣中書旋捷禮闈分兵部行走

六月 亮鈞 分工部營繕司行走

是年堵築徐州子房山溝河搶護子房山南一帶大
堤按徐州子房山溝河漫水由蠓蛤周柳等湖下侵
運道建瓴直衝水入囊底所謂跌溜也先時曹工決
口開子房山溝河以洩其漲然地窪水急衝刷寬深
漸成狼矢之形河漕兩病余乃集夫料日夜僨堵至
將合龍時埽忽拆裂如懸水倒傾并捆廂船衝決漂

尚東下時已三更恐再衝失餘埽至奪全溜乃急洩
原船歸位如式堅築越十餘日堵合完竣又報子房
山溝河迤南大堤過水急往查辦水已漫頂二三寸
不等幸隄土膠結尚未衝出溝槽調運夫料不及隄
上有舊爛草房五六間卽重價買得就令居民拆草
土堵截草朽土鬆卽草卽土築到處隨卽閉氣卒底
於平治河當倉卒時惟在調度得宜而已

是年七月議開山陽縣澗河通水利民不果按淮城
東南澗河由射陽湖至廟灣新豐市一百八十里拽

運河之水入海甚捷自明迄今黃河南岸童營老壩
口漫水皆由澗入射陽湖以致填淤然其地平下易
治人力可施河成化沮洳爲平疇非如興鹽之形如
釜底盈科後進也乃親歷其地考證詢謀定議興舉
委員逐細計估起澗河牖下經通濟橋至劉均溝入
射陽凡一萬四千餘丈開寬十丈深八九尺至丈餘
不等計日興舉因工大費鉅擬疏請借帑修復適報
毛城鋪洩水奪溜相率赴救踰年罷官去疏建善舉
竟托諸空言矣

八月樓護補治洪澤湖高堰一帶風掣石工事詳河渠紀聞中

是月毛城鋪洩水奪溜余督率兵夫漏夜搶護將丁家集高家莊傅家窪張家寨四道溝槽悉趕堵斷流壩工完固惟餘邵家壩口門因大溜湧激漫刷加寬直至十二月合龍後又緣凌水陡長壩基平墊滲水連夜鑲壓相機進占尅期蒞事

嘉慶五年庚申七十三歲

正月邵工大壩功已垂成猝燬於火奏請治罪奉

旨革職留工効力三月離河督任仍在徐州辦理

石林上下挑水壩各工程

十一月邵工合龍奉

上諭朕聞康基田從前辦

理地方事務尚爲熟練操守亦屬廉潔著交費淳於

江蘇安徽江西三省內遇有知州缺出奏請補用

嘉慶六年辛酉七十四歲

正月題補江蘇太倉州知州三月赴京引

見始

獲仰觀

天顏並呈懇代奏請叩謁

裕陵

蒙

恩准往念切瞻依縈心六載感戀欣慰一時

左言
卷一
交集於衷云

是年江督費公淳河督吳公璈疏稱豐北廳屬之楊家莊石林工一帶地居北岸迫近運道向來最爲險要上年堵合邵壩時臣等同康基田相度形勢於吳家樓包家樓退河集等處預設挑水壩三道用埽鑲護挑開大溜南注不使逼近北岸今經伏秋疊次盛漲楊家莊石林一帶數百丈堤埽化險爲平已經淤閉無庸鑲修每歲所省工料不下十餘萬各壩保護平穩等因奉 硃批敬慰覽之按余是時留工効

力審度河勢深知北岸危險情形乃於石林工上下楊家莊包家樓退河集等處各建挑水大壩三道迎面用埽鑲護築壩時皆平灘無水見者以爲乾地施工哂其妄費而余不顧也及邵壩合龍後黃水大至包灘而過直衝壩身三壩以次挑溜南趨全溜爲壩所逼奔騰迅疾如箭直入邵工新挑引河石林一帶百餘丈埽工卽時淤閉歲省鉅萬迄今十餘年三壩歲修不替大河滔滔順軌深刷成槽徐州歲奏安瀾三壩之修顧可忽乎哉

年譜
卷下
六月抵太倉州任舊地重來恍符夙夢咨詢民隱隨時興革一如作令時大濬瀏河瀏河婁江入海口也時內外皆淤蘇松港河不得節宣之益商民舟楫阻塞鎮市蕭然余亟請疏治岳中丞據詳奏准照例沿河州縣合力均挑越兩月工竣仍議復舊閘備勒啟閉事宜於碑以永其利

秋

綸鈞

以吏部郎中授陝甘學政

冬浚七鴉浦出海河道復舊牖七鴉浦爲婁江別支自崑山西至和塘而北合常熟崑新陽城巴城諸川

滙流入海蓋東北洩水之大港也浦出岡身地多高阜太倉東鄉瀕海之民仰浦水溉田兼資汲飲每苦潮沙上壅淤墊浚治維艱余疏瀏河工竣因民之力疏浦之淤自沙頭鎮至閘口開通六千七百餘丈功成復慮其淤爰訪修舊牖以筦之牖去海三里牖門三空潮來下板蓄清拒渾潮退藉其力合清水以攻沙外水旣不能壅入泥沙而浦水常得通利無阻旱則灌沿海高阜之田潦則洩上游低田之水啟閉如法成效大著

十月署松江府濬華婁南青嘉寶等縣練祁新涇諸塘及農田溝洫按自大浚瀏河婁江之塞者已開而支港小河通入婁江者淤淺不能自達於江以收灌溉宣洩之益前明青浦令鄭友元議定築浚事例令業主出米佃戶供役通力合作人皆稱便日久弊生蠹吏豪強借以歛錢代役誅求入橐不歸實用疏未及半卽放水淤復如故鄉民慣受其欺是以每一浚河令出輒畏縮不前飾辭懇免余自太倉調署松江習知其弊嚴行禁止親宿田間往來諭導惟各照田

出力不復歛錢民始曉然信爲實事踴躍趨赴不待傳呼而自輸其應出之力甫三月各鄉俱報竣事適值大旱彌月蘇常農民車戽爲勞松太屬內支港充滿隨地引灌嗣復霽雨連旬上游水溢婁江出海通暢支港隨流分洩兩得其益是歲大熟葺雲間書院暇則與諸生及張君興鏞子公璠等講學其中忘其左遷并忘其爲暫攝也

嘉慶七年壬戌七十五歲

在松江七月擢廣東布政使九月抵任值秋雨連綿

城中通衢積水三四尺不等余詳稽志乘遍詢父老僉云明初築城時曾開六渠以疏地脈迴環貫串滙於南濠入海故名六脈萬厯後漸淤廢居民或建樓房于上溝形遂迷前制府福公會委官濬治而故迹久湮難尋書役輩又借端拆屋啟視橫行索詐百姓驚惶奔訴不得已中止余亦籌治無術適濬南濠之玉帶河淤塞工竣乃駕扁舟沿河崖驗收所挑淤土土淨忽露溝口六土人詫云此卽六脈渠之口也因鳩工先從溝口節節挑入溝高七八尺至丈餘濶六

七尺四面皆鑲青石石巨縫細工極精緻遇居民屋底掘其泥沙仍聽鋪板溝面無少損民大悅有奸民圖利以土石填實溝口並建神廟于上使人畏憚不敢動余諭之曰神庇佑一方民利卽神利豈肯與民爭地耶亟令移送他處於是人心翕然帖服通力合作閱三月而二百餘年淤塞之六渠脈絡全通奔湧如注從此城中滴水不存矣遂作記勒碑告後來者
嘉慶八年癸亥七十六歲

在廣州羊城粵秀越華外余又添設羊石珠江兩書

院修文昌宮魁星閣復議移建貢院未成而去三月
調江西布政使以路遙五月先送內子由松江就養
京寓七月入 覲七蒙 召對訓誨諄切復調
藩江寧 陛辭出京後忽有料販武永靖誣控欠
伊料價質訊全虛抵罪奉 硃批此人甚屬狡詐

九月抵江寧藩司任

嘉慶九年甲子七十七歲

在江寧浚秦淮河引水入通濟橋自東而西歷文德
武定鎮淮飲虹陡門諸橋出西門之東水關北入於

江掘去瓦石垢濁限日程功又於水關內築活壩夏
秋水發葢壩而出冬春水涸修壩蓄後湖之水灌河
使不乾淺余籌項委官計方深濬三閱月工竣設浚
船四隻撈淺夫八以善其後官民往來運行舳舻相
望於道貧民亦得資其生計人咸稱便

四月 亮鈞 補工部虞衡司員外郎

十月開祥符牘濟回空運船三千餘艘按漕船空運
到次修繕完整須依期早到備來歲重運甲子十月
十八日回空船未渡黃者尚有三千餘艘轉瞬河凍

全言 卷下 三
船阻必悞新運是日陳制軍監試武闈甫進內場門
尚未闔余亟往見曰事急矣請速發令箭飭啟祥符
牘引黃助淮濟運一二日試竣仍當親往督催制軍
如其言卽發六百里羽檄催啟牘閱五晝夜三千艘
全出清口船去不旬日而河水結矣通塞在呼吸之
間機不可失如此然後速閉牘口外加埽壩滴水不
漏五道引河全未受淤而濟運毋悞

嘉慶十年乙丑七十八歲

在江寧春濬江浦縣朱家山洩水河道余疏治秦淮

河既竣江浦滁州全椒來安六合五州縣士民合詞
呈請疏江浦之朱家河咸稱五州縣民田居四山之
中山水猛烈築圍保護水漲則合社男婦并力守圍
一有決壞良田頃刻變爲江湖俯仰無資惟朱家山
支河分洩迅利爲拯飢救溺至捷之要道籲請開鑿
余詢之江浦牛令云目擊婦女襁負救水圍破時哭
聲滿野甚有負子棄入水中者余聞之惻然乃親往
巡視踰朱家山有滁河一道橫長二百餘里五州縣
之水皆由此入六合縣瓜埠歸江其地環滁皆山山

水湍急居民各築圍護田夏秋水盛漲並待洩於
二百里之瓜埠迂緩不及圍田往往罹患查朱家山
附近諸圍地高水下勢如建瓴宣洩迅利乃定議興
挑由張家堡之煨罐橋入口曲折迤邐至宣化橋出
口入江估挑四千七百餘丈深廣隨地所宜掘河中
土置嶺後艱難勞瘁十倍他役而民情踴躍歌呼趨
事三閱月工竣惟滁河一線出兩山間山高聳壁立
土皆膠泥下掘則上傾竭力撈挖成河南開放忽滁
水大至衝中段山崩入河阻水不流余復集數縣人

夫駐工督辦自正月迄四月歲事計前後費七千餘
金初五州縣士民呈請公捐余恐胥役借端滋擾閭
閻不許乃設法籌款並與各牧令商捐廉俸卒底於
成其年滁河通流得資宣洩五州縣圍田無恙歲獲
豐收仍擬於冬春間再加寬深削去兩岸淤土增建
插壩蓄水勢備衝刷爲百年之利會罷任去弗克竟
其事迄今思之猶耿耿於心是所望于後之君子矣
三月議開下河出海河道按海口本出岡身地形高
仰內地高寶興鹽形如釜底水至則先淹浸舊時鑿

渠通海清水下注又濟以閘壩故海口通利無虞自黃水南來淤湖海口漸塞雖加疏濬路遙工鉅不敵潮汐之時至故旋開旋淤余疏苾稻諸河歸江路後更籌歸海之道委官分道確勘估量寬深丈尺將計日興工適罷任去事詳載河渠紀聞中

姪孫汴捷禮闈以知縣歸班選靖軒兄次孫也

九月間亮鈞婦王氏卒於京寓婦柔嘉淑慎不妒不

忌閨閣中罕有其倫數十年來自余夫婦及家之上下無不起敬不幸中年溘逝痛惜不已念其賢而無

出命以綸鈞第三子同治為嗣並作家傳手書此數

語勒石以誌明年為亮鈞繼娶金陵翁孝廉恩元女

嘉慶十一年丙寅七十九歲

在江寧正月余既挑通人字等河復大浚高寶西岸通湖諸河四月制府鐵保公疏稱人字芒稻等河歸江之路經藩司康基田親駐河干不辭勞瘁督辦竣工臣親往察看各河高下形勢建瓴甚為順利鄉民耆老亦稱此次挑竣之後揚郡一帶可保無虞惟人字河頭溜勢稍急鹽船經過挽運維艱據查人字河

北岸有月河一道鹽船由此起行走較爲穩便亦經該
司委員挑通以裨運務又將高寶西岸通湖支港大
小新河及鰲魚等十一港歸江要路一并疏濬深通
以暢其流等因具奏

五月因督催銅鉛運遲延部議降二級以無級可抵
請革任蒙 恩以六部郎中用九月抵京寓大安
南營

嘉慶十二年丁卯八十歲

在京五月補戶部四川司郎中

七月

亮鈞

扈從秋獮蒙

恩賞戴花翎

綸鈞

由

吏部郎中陞鴻臚寺少卿歷轉通政使司叅議

嘉慶十三年戊辰八十一歲

在戶部

二月

亮鈞

題陞工部製造庫郎中

三月奉

旨賞知府銜隨同協揆長麟公大司空

戴公衢亨馳驛赴南河辦工時江南督河兩院有請
修毛城鋪石壩以減黃利運之奏余於東南兩河情
形纖悉備知不敢附和其說因於途次告兩公曰修
毛城鋪不但工費浩繁且今昔形勢不同啟放時恐

有他虞惟王家山十八里屯有前河帥靳文襄公就
山根所鑿減水深底石閘二座久已湮廢淤入地中
某曾履勘該處小石山一座中峯兩旁有土縫二道
西山縫業已填塞東山縫內尚露舊時壩頂應請
旨修復實事半功倍其毛城鋪石壩可以毋庸辦
理兩公據以入 告奉 上諭康基田曾任河
臣近因年老改用京員此次派令隨往獨將十八里
屯舊閘基址呈明辦理可見其平日留心河務深中
窾要應予嘉獎康基田著加恩陞賞道銜並賞戴花

翎其修復毛城鋪石壩之處毋庸議抵清江浦後蒙

特加太僕寺少卿銜 命專管勾稽南河要

工錢糧 天恩優渥感荷靡涯矣

嘉慶十四年己巳八十二歲

在清江浦館于崇實書院勾稽商捐錢糧事務

嘉慶十五年庚午八十三歲

在清江浦九月二十八日將原備馬港工用銀共三
百二十五萬兩按數勾稽核實樽節全數交工應用
開列清單具奏 硃批該戶部知道

十月風暴掣塌高堰山圩石工並仁義智三壩掣通
過水奉 旨飭江督松筠公將高堰山圩等處三
壩過水分數究有若干湖水由何處灌入運河從何
處宣洩回空糧船有無阻隔查明據實速奏覆稱查
嘉慶十年啟放義字壩湖水外注彼時通江之人字
芒稻等河淤塞是以下河一帶並被漫淹嗣於十一
年經前藩司康基田親往履勘倡議捐修挑濬甚爲
通暢此次三壩下注之水由該處河道順流入江附
近民田藉以保護免致浸灌回空糧船已過四十五

帮通行無阻等因具奏奉

硃批幸慰欽此先是

嘉慶十年夏洪湖水溢山圩義禮智三壩並開水奔
騰下注高寶湖滿溢入運於時人字芒稻等河填淤
入江路滯當事者不得已啟南關五里昭關等壩放
入下河致高寶興泰東鹽阜七州縣民田廬舍多沉
於水幸有存者舉家八口倚農舟爲命泰州沿河停
集四千餘艇號呼滿野我 皇上軫念羣黎不惜
數百萬帑金拯救飢溺余時再藩江寧奉 命查
勘撫卹先購蘆蓆數萬領散給各船作棚蔽風雨以

次資其口食俾居行有藉分道四散各覓所依乃周
歷各鄉所過水深淺不一茫無津涯方舟難進掉小
艇入至水深浪急處風擁水入舟轉側不定屢驚欲
覆彌望居民廬舍止見屋脊觸目愴懷不覺淚涔涔
下乃矢心加意賑恤亟籌長策思通流下江時水已
抵揚州東門闐闐告警稟商制府離使籌借商力慨
助十三萬金余自請臨工督辦查運河東岸宣洩洪
湖之水有歸江歸海二道歸海路紆三百餘里下河
州縣地形窪下水未及海先遭漫沒由運入江五十

餘里水高於江建瓴直注引之歸江爲便惟是各牘
壩下港淤久河身淤平兩岸逼窄芒稻東西七空三
空西牘口門填墊尤厚民人築基佔蓋屋宇上游港
水滙流處鹽舟因水急難輓又築壩攔截阻遏江潮
迴流擁沙停積甚厚余乃沿河勘估取直濬深大加
闢展委官分段承挑親駐仙女廟往來督辦三閱月
芒稻東西四大河邵伯十一港凡遏塞淺阻處掃除
淨盡又增開人字河東岸月河以利鹽船輓運盡撤
河頭之壩功成下流悉皆通暢時或以河運多事未

暇旁及謂急其所緩者余笑置之越數歲至庚午秋
淮水異漲高二丈餘仁義智三壩同時衝開全淮東
注滂湃莫可遏禦高寶諸湖已將盈科而水悉由人
字東西四大河奔騰下江淮揚宴然無警松制府臨
工目擊暢流入江情形於是南關五里昭關諸壩得
以封土嚴守不啟下河州縣得以莫安無虞事固有
程功於數年前而收效於數年後者國計民生孰大
於此余惟親見黎民沈溺之苦身經蕩舟之險知水
之必當分洩於江知四河之開終得其用故竭力爲

之而弗顧詎敢急其所緩哉

嘉慶十六年辛未八十四歲

在清江浦正月南河大工告竣以年老具摺乞休並
陳明原籍並無切近可靠親屬請來京就養等因具
奏奉 上諭據康基田奏南河要工錢糧勾稽完
竣現無應辦事件伊年力就衰懇請休致來京就伊
子康綸鈞康亮鈞寓所居住等語康基田曾任總河
獲咎後經朕棄瑕錄用前由戶部郎中特加太僕寺
少卿銜命往南河專稽要工錢糧受事以來已閱三

年譜 卷下
載辦理尚為認真現在海口工竣經手事件已完自
可無需留任伊年逾八旬着加恩准予原品休致伊
子康綸鈞康亮鈞現在京供職卽照所請准其來京
就養以示優恤閏三月仍回京寓諸子姪等團聚一
堂同深感激從此杜門謝客暇則檢點舊稿續河渠
緒論補晉乘蒐畧諸書或作壁窠大字自娛迴憶六
十年來宦轍幾徧天下所過名山大川其間煙雲變
幻歷歷如在目前擬刪定諸稿後或記或詩分題補
作以當卧游藉消歲月亦閒中雅趣也

嘉慶十七年壬申八十五歲

在京先是

亮鈞

郎中俸滿保舉引

見記名以繁

缺知府用三月選浙江寧波府知府因先經呈明親
老乞近照例扣留七月改授直隸順德府知府赴熱
河謝 恩召見垂訓周詳又蒙詢基田精神眠食

及全家在京居住是否慰貼一一復奏仰見 聖

顏怡霽 天語溫和教誨體恤有加靡已直不啻

家人父子

亮鈞

跪聆叩謝還向余夫婦敬述共感

鴻慈囑令實力圖報勿辜

聖恩促卽赴任 亮

鈞抵任後以余歷任河工分賠攤賠代賠各項積至三十餘萬兩除奏准扣廉并陸續措繳過十餘萬兩尚有未完銀二十餘萬兩產業蕭條無從設措體余急公之忱不敢安領全俸卽呈懇大府據情代奏請每年扣繳養廉之半代清賠項仰蒙恩准感荷並深

十一月

綸鈞

因連殤兩孫過痛病亡

綸鈞

久官銓部

游躋卿班勤慎供職自余

予告來京兩寓相距

咫尺公趨之餘必來問安侍食頗慰晨昏猝遭此變

殊愴老懷

亮鈞

聞信卽馳稟遣家奴來迎余諭之曰

事已如此我尚能達觀自遣不至過傷勿慮且天寒不便就道候春融再酌親授同孫業延師督課之

嘉慶十八年癸酉八十六歲

在京正月

亮鈞

因護送伯克差來京省侍留十日請

歸養不許預定於三月二十四日南下旣而有重赴順天鄉試鹿鳴筵宴之舉改期九月

三月江督百齡公河督黎公

世序

奏請改建山盱五

壩聖意以事關重大必須集思廣益方可施行

以基田明悉河務 特傳諭命偕光祿卿吳公敬

入朝與相國勒保公少司馬初公彭齡會議大畧

以為仁義禮三壩石底損壞原處自難修復改建議

是惟所挑引河兩旁居民鱗次引河淺狹水必泛溢

恐所傷實多應於引河兩旁相度地勢高下即以所

挑之土培築堤堰以免淹及民田廬墓之患聯名具

奏奉 旨知道了都人士見余精神矍鑠如舊咸

相詫羨云

六月奉 上諭鄒炳泰等奏予告太僕寺少卿銜

康基田係乾隆癸酉科舉人在京就養懇請就近重

赴鹿鳴筵宴一摺康基田曾任總河巡撫嗣以太僕

寺少卿銜休致茲年登耄耄蕊榜重逢洵屬儒林人

瑞著加恩賞給三品卿銜准其重赴順天府鹿鳴筵

宴以光盛典跪聆之下欣感彌已即具摺赴 園叩

謝 天恩九月十一日兼大京兆鄒冢宰炳泰以

安輿來迎赴順天府與諸郎君序老少同年入宴禮

成都下傳為盛事正擬啟程南下順德忽聞有逆匪

滋事軍興旁午而止

先公年登耄耄精神彊固嘉慶十八年九月中因
逆匪滋擾晝夜焦灼不安血虛火盛引動多年河
干積受溼熱暑膝臃腫醫葯罔效於十二月十四
日申時疾終京邸安南營正寢垂危猶執侍疾者
手問軍營捷報無一語及私左右皆欷歔感泣既
乃伏枕叩謝

天恩口授遺摺喃喃不已 先公一生心存

君國臨終不忘於茲可見正繕辦間適弟紹鏞擢鴻臚寺

少卿謝

恩召對已蒙

仁宗睿皇帝垂詢先公以何病逝奏答之下仰窺

天顏悽惻歎惜再三遺摺因未及遞時亮鈞在順德承辦

軍需訪拏逆匪仰荷

特恩加銜加級因足疾暫解任間聞訃痛不欲生徒跣奔
喪正月初抵京抱恨終天負疚罔極恪遵遺命於
乙亥四月初十日卯時安葬玉屋山下舊卜之馬
嶺新阡嘉慶二十三年奉

旨入

國史館列傳道光五年七年先後經河南山西撫臣
題

准入祀名宦鄉賢各祠並入祀晉陽三立閣祠

恩沐


三朝感深百世前學使蔡太史賡賜所撰續三立祠本傳

已附刻入崇祀錄後敬檢遺篋有辛未

予告還京自撰年譜稿一冊其中事實間有遺漏節錄自
著文集及河渠紀聞內所載補入此外概不敢妄
爲增刪悉遵原本以承先志而昭核實並摹晚年

遺像錢列詩集卷端示後

道光七年丁亥中秋日 男 亮鈞敬識



全譜

卷丁

三

<p>Vertical text column 1</p>	<p>Vertical text column 2</p>	<p>Vertical text column 3</p>
-------------------------------	-------------------------------	-------------------------------

